

ZION THUSUAK



REVIVAL CHURCH OF GOD (RCG)

Vol. XXVI January - February 2022 No. 131



THUPI:

**“Kuale Khrista ah a um chun, Thil siam thak a hung hi
ta, thil lui te chu a bei ta, ngaitia, thil zosia chu ahung
thak tai”**

2 Korinth 5:17

Editor: Rev. Dr. Khupkam Vaiphei

ZION THUSUAK

Editor:

Rev. Dr. Khupkam Vaiphei

Associate Editors

1. Rev. Liante
2. Rev. Ngulneipau

Contributing Editors:

1. Mr. Kh. Sang Vaiphei
2. Rev. Kailum

Board Members:

1. Upa Mangkam
2. Pro Pastor Lianboi

NOTICE

Zion Thusuak article zosia hi thugin lam thu ah editorial board ten maw pawkna akinei puan, article hun piate mawpuakna ah kawi ahi ziakin dawtnawp a um chun, amau dawtzawk dingin ka hun genchian uh a hi.

By: Editorial board ZT

A SUNGAH THU UM TE

	<u>Page No.</u>
1. Editorial	01
2. Bible ah pianthak/siamthak ati hi bang pen pianthak/ siamthak di ahi diam?	02 – 04
3. Setan hina thugin (Doctring of Setan)	04 – 09
4. Jacob lawtinna thuguk	09 – 11
5. Malam kinepna	11 – 13
6. Thepna bangti zaw ding?	13 – 16
7. Pathian thil hithei na midang kiang ah taklat a hithei nading in nang a mamaw lahi	17 – 21
8. Pauchapna hetding te	22
9. Report	23 – 24
10. Hetsakna	24

Editorial... ✍️

Unaute Amasan I Lal ule ei Hukdampa i Lalpau Jesu min in la leng un kumthak 2022 chibai ka hun buk hi.

Kum 2020 kumbul apat leh 2021 kum kim zaw August tha tianga khan Corona virus, Covid-19 natna hivei ziakin I dawibang tak un kikhawpna leh kive thakna alanei tamlo in um maleu hinle ningkum 25 December 2021 Christmass leh Kumthak 2022 lawpna hun te kilawm tak leh nuamtakin phat te mangthei ah I umthei ziakun ei puitu Pa Pathian chu Pak in um ta hen.

Kum cheng le kum ahung thak taw kitawn in Pathian kiangin thutiamna nei ah kikhel ding le ama lunglam ah hinkhua mang ta dingin alagen zing sek le aki um maithei in maleh kum kim le hinai lo ah a thutiam te hephalo ah kinung hei kit hi ala tam ma ma in, tukum in vang ziagual chun umta lo dingah ki khual phai tiu in I kam ah leh I lunggel ah inei te igen daw te hi Lalpa'n ahe zing ahi ti hemil puai tiu aw. Tukum 2022 kum inle bang gual ituak ding le aki he puan, mawk lung muan ziang khak dile Pathian panglo in vang kibi khial kha thei ahi aw. Abang hile Pathian gam leh a dikna te hawl masa phawt hitiu in hileu hin, Aman bangkim ei he na ahi. Ama panglo in mawk kipak ziang, mawk lungkham ziang, lauthawng ziang ti haw hi paithai tiu in, Ginna ah malam kinepna nei in Paul in Philipi mite kiangin "...Nunglam ah thil umte chu hemil in malam ah thil umte chu ka del ham ham ahi" Philipi 3: 13. Ati gual in tukum in kum athak ziaka thakte hizawlo ah thil lui zosia subei ah Khrista ah siamthak ah hung um thei ta dingin lunggel neithak ah Khrista a dingah pan thak la khawm chiat thei ta dingin Lalpa'n a thu hi hun malsawm ta hen. Amen.

**BIBLE AH PIANTHAK/SIAMTHAK ATI HI BANG PEN
PIANTHAK/SIAMTHAK DI AHI DIAM?**

By: Rev.Dr.Khupkam Vaiphei

Bible simdi, Johan 3:3 **“Jesu’n a dawn hu ah, a kiangin, Timatakin timatakin ka hil la hi, Mi a pianthak lo chun, Pathian gam mu thei puana a tia.”** Ephesate 4: 23-24. **“La lungthim thagau ua chun hung kisiam thak ta un, chun, mithak hinna ah chun hung kithuam unla, thutak felna leh thianthona Pathian ah kipat siam ah um chun hung kithuam ta un.”**

Bible ah Pianthak, Siamthak ti umzia hi, mihamte taksa hi kisiam thak ding leh Piangthak di tina hilo in, Lungthim, Lunggel ngaituana te Pathian thu ah siamthak ding, Pianthak ding tina ahi. Bible ah kimu gual in **“Chi sethei ah hilo in, chi se theilo kumtuang ah hing leh umzing, Pathian thu ah Piangthak la hui ah.”** 1 Peter 1:23. **“Atil in thu a um ah,Thu chu Pathian ah a um ah, zia Thu chu Pathian a hi.”** Johan 1:1

Mihiamte taksa pumpi hi lunggel ngaituana in apuivel ahi zia kin, taksa siamthak dile, pianthak saktu hi lungthim ngaituana ahi ti Bible in eihil ahi. Zia zia k a chun, mihamte siatna leh phatna bawlsaktu chu lungthim ngaituana ahi ti akichian ahi. Pianthakna hi chi sethei ah pianthak ti a um ahi, a zia k chu gentheina ziaka pianthakna, lusunna leh accidentna ziaka pianthakna leh mi mu ding mai ah piangthak umchan vak thaw thei ah piangthak te a um kit ah ziagual ah piangthak te chu phat chawmkhat kal a ding bep ala hi sek ahi, a zia k chu amau ah Pathian hepina leh phatna thu

him him a umlo ziakin, Pianthak kiti hi bang hem ti thil khat I chungah atun zia mai ah piangthak kisak khak hi abai lam ma ma ahi. Ahin ziate chu Bible in chi sethei ah piangthak ati te chu ahi. Pianthakna leh siamthakna hi Pathian thu diktak in alungsung ah thu ahun gen in, zia thu hung kigente chu zawm ah zuithei ngalte Bible in Chi sethei lo kumtuang ah hing leh umzing, Pathian thu ah Piangthak la hui ati chu ahi. A zia chu zia **thu** chu Pathian ahia, Thagau le ahi kit in ahi. Tichun, mihiam te chungah Pathian leh A Thagau hung um ahi ta'k ziakin ziagual mite chun chau hun nei maleh puk kit ah nungkit ngai him him lo ahiu hi, Piangthak diktak te chu Pathian Thagau inle a hopi zingin, anusia ngailo ahi, a zia chu aman Pathian thupiak azawp ziakin leh a zui sek ziakin, Johan 14: 13-17. **“.....Ama chu thutak Thagau chu ahia, khawvel in ama amu lo zia le a hiatlo zia ala kipakpi theilo kha, himaleh nangmau hawn chu la hiau ah, ama chu nangmau ah um ding a hi ziakin, nangmau ma ah chun hung cheng ding ahi.”** Piangthak diktak te kiangin Pathian Thagau a um hi ti a ki chian ahi. Ama ah Pathian Thagau a um ta'k di ziakin Thagau puihawina ah um ahitai. Ama Pathian Thagau umna ten Pathian lungthim natna ding leh dawilo lam in ataksau, a lungthim leh ahinnau amangcha ngai lo u ahi. Ziagual mite chu Bible in ziagual hin agen hi **“Jesu'n a dawn hu ah, a kiangin, min keima ei hepi chun, ka thupiakte hun zawm intin, zia tak chuleh, ka pa'n ama chu hun hepi intin, chuleh akiangin hung ing katin uh, ama a chun hung umdi ka hui.”** Ati ahi. Johan 14: 23. Min Pathian Thagau anei chun um dingdan leh khankhua thu inle a ngawl ngai puau in, chuleh ama ah pat kituaklona leh kikhendal na a um kha ngai him him lo ahi, Jesu'n hiti hin eila hil ahi, **“Min la chungah a hi dingua la nawp gual gual a chun, nang inle mi chung in hi in.”** ati ahi. Luka 6:31. Mi Piangthak diktak leh Thagau diktak

chang te'n a suapi a unau lungthim natna ding leh phatlo na ding him him a ngai tua ngai lo ahi. Pianthakna/ Siamthakna kiti hi hi ataksa mel lamdan umpiuan tin, a lung gel leh a khawsak dan in vang danglam ding ahi. Nang in danglamna la nei theina em. La lungthim, la lunggel ahi siamthak na chang di chu, Thagau ka chang hi, Piangthak ka hi kiti ngal, himaleh, alungthim ah phatlona, engsiatna, thangthipna, leh chapona anei zing chun apiangthak lo, Thagau changlo ahi ti Bible in ei hil ahi. Ephesate 4:23-24. Na ah Bible I hun simthak nau gual in. Lungthim thagau ah hung kisiam thak in, mithak hinna ah chun kithuam in, thutak felna leh thianthona Pathian ah kipat siam ah um chun kithuam chiat hitiu in, Pathian leh a kochuam te matchak pha pen hung chang ah, umna kochuam te phatchuampi member hung hi thei chiat ta dingin lalpa'n a thu igen teu I mimal chiat un ei malsawm ta hen.

SETAN HINA THUGIN (DOCTRINE OF SETAN)

By: Rev. Dr. Khupkam Vaiphei

Thumapui:

Setan hi masang a chun Cherub sathau nu Pathian siam Eden huan ah huan vengtu ding in kawi ala hin ahi. Suangmantam chitin in akizem ah, Amel put inle ahawi in, alopi ahi. Pathian tang Thiangtho in a um ah, suang meikuang lak in a vak suk a vak to sek in. Ahawina leh apil na te ziak in chapo na ahun nei in, Alung gel in van chung lam in kal to katin, aksi te umna khel lam in ka lalchut pha tung sang ing katin, chungnung pen pen in um tangka atia.

Pathian siam ten ama ahunho diu le a hun chawihawi diu chu ahun dawisak ta, ahung kichung lap in, Pathian ka hi ahun tia. Zia haw zia a chun Pathian in van apat in ahun naw tha ta ahi. Chun ama hi alim in Lucifer, zinglam chapa ti ahi. Ama hin tuni tiang in a Lal chutpha a chun khawvel ahin vai ahawm zing ahi. Siamtil bu 3:23-24; Ezekiel 28:12-17; Isaiah 14:12-17.

Ama hi Khawvel lalchapa tin le hiat ahi. Johan 12:31 leh 14:30. Khawvel Pathian ti inle gen ahi. 2 Kor.4:4.

Lucifer zinglam chapa chu Setan ti in san ahung hi ahi. Alim in amin chu setan hilo in Lucifer ti ahi. English pau lui in Setan kiti ahi. Setan min umzia tak chu ahile **Hebrai** pau in, Melmapa, dodaltu leh sumangtu tina ahi. Greek ten Diabolos tin alet kit un ahi. Setan hi taw thâk ah um Angel tin le gen ahi.

Lucifer hi **Latin** pau ah pat ahi, amin umzia chu ‘Vak puapa’ (light bearer) zinglam chapa (Son of the morning) ti ahi. Zingsawl Aksi taw tekak ahi. Acha’ng le sun aksi (Day star) ti inle gen ahi. Chuleh thim Lal chapa (Prince of darkness) tin le hiat ahi.

Van apat taw thâk, paithak ahung hina zia tak pen chu ama le ama Pathian ahung kisak ah, chapo na leh kichunglap na ahun nei zia tak in van apat paithak hung hi ahi. Zia zia tak ahin ama hi Pathian melma hung suak in tuni tiang ahin Pathian cha hithei na neithe i te hi thepthak guan pui mang a gaw zing ahi.

Pathian melma pa Setan lampi leh a thil guan te la hiat lo chun, dâ male chunle ama mi leh sa suak thei lahi. Zia zia tak a chun Setan din

mun, leh apan mun te hi hiat daw angai zia in zia anuai a te hi setan hina leh anasepte chu ahi.

Setan hi mihiam te gual in a um in, ama hina te chu zia gual hi ahi

Thempa ahi. Siamtil bu 3:1-6. Thupuan 12:9

Zotheipa ahi. Johan 8:44.

Tual thatpa ahi. Johan 8:44.

Migilote pa ahi. 1 Johan 3:10. Mathai 13:39.

Dawha bawlpa ahi. 2 kor.2:11; 11:13-14.

Dodalpa/melmapa. 1 Peter 5:8

Pathian thu/Bible diklo ah mang/let tu ahi. Mathai 4:6

Gingtu te henchak tu ahi. Luka 13:16. (Ephe 2:2-3.)

Setan in gingtu te chung in anasep te:

Gingtute puikawi ding guan athem sek ahi. 2 Kor.11:3. 1 Tim.4:1; Rom 16:17-18; Marka 13:22; 2Tim.3:13. (zia hi lungthim apat hung kilangbep hilo in, kimaituapi thei ah umte, lawipha ah kisiam te, mihiam te ma ma hi thei ahi)

Thepzaw ah puikawi ah ala um kha te en in: Evi. 1Tim 2:14 (Gen.3:13)

Gingtute genthei a thawk sak sek hi. Job bung 1-2. (Zia hi mihiam in amu thei chu hilo, maleh melma pan athei chan in gingtu te a sawisel sek ah, Pathian phalna pang in mihiam te chung in a nawp dan tak in thil phalo atunsak sek ahi. Zia hi chu Pathian mi tak tak, ginna ah ki ling lo ah ding det thei te tilo ding in hiat haksa tak chu ahi)

Gingtute zo agen sak sek hi. Nasepte 5:1-4.(Zia hi setan in mihiam lungthim sung ah ngaitua na in ahun thunlut te ahi sek hi, Pathian Thagau panglo in zia hi mihiam ten amau hiatna mai ah hung piang dan in angaitua sek in ahi.

Zo gente: Abraham, Genesis 12:11-13;Anani. Nasepte 5:1-11; Peter, Marka 14:70-71; Joseph suapi te, Genesis 37:28-32; Herod Mathai 2:7-8.

Pathian ang in gingtute ahek sek in ahi. Thupuan 12:10.

Gingtu masa nungzui te chung ah setan thilbawl leh nasepte

Aman Juda Iskariot kha Khrista aphatsan sak ahi. John 13:2
A man Annania leh Saphariate nupan kha Thagau Thiangtho azo bawl sak ahi. Naepete 5:1-11. (Min amulo ule ahiatlo ziakun Pathian in le mulo helo ding in a kawi sek ahi)

Aman sawlchak pual kha abengniam sek. 2 Kor 12:7. (Lawsam hina te leh dinmun kiakniam na te chuleh kisukliamnate hi ahi)
Jesu Pathian chapa kha le anuai ah kun ding in ala them ahi. Matt.4:1-11; Luka 4:1-13. (Thudik chu hi, eiding ale phatchuam theina te, haksatna le thuaklo ding ah ki kawi nuamna te haw hi ahi)

Melmapa umdan te la hiat zaw nung in zawthei na ding lampi um te:

Nangma ahin setan sang in hâtzaw leh lian zaw a um hi ti hedawk in gingtute khat la hi ngal chun. 1 Johan 4:4.

Setan thuneina chu khross a khan suk mang/suk siat ahitai ti la masang in kawi zing in. Hebrai 2:14; 1 Johan 3:8; Kolo 2:15

Khrista thisan leh I chanchin genteu hin Setan chu la zaw thei ahi. Thupuan 12:11.

Setan hi la dal chun mi dawí lawk ahi ziaq in hun thuk kit ngamlo ahi. Jacob 4:7; 1Peter 5:9.

Thagau chemzâm Pathian thu, Pathian galvan chu la un..... Ephesi 6:10-18; 2Kor 10:4.

Ginglo mi la hi khakchun, Khrista chanchin pha gingah taksang tute chu thim thuneina leh setan etkawl na nuai apat pawt ahi tau ahi ti hi hezing in taksang in um in. Hebrai 2:14; 1 Johan 3:8; Nasepte 26:18.

Setan hi kua ahia, a nasepte bang ahia, tu le tu ah bang din mun in ading em ti te la hiat tâk ziaq in ama thûn umka lati le nangthu, umpuang ka lati le Nangma thu thu ahi.

Zia a chung ah hillawkna thu hi melma pa chan chin, gingtu te suk mang gua ki salel pa ahi ti hian, ama dawilam ah chialo in, Lalpa Jesu dawí lam zawk ah hinkhua kimat ah, midangte le Lalpa ang ah hun puilut chiat thei ding in Pa Pathian in hun malsawm ta hen. Amen.

“JACOB LAW TINNA THUGUK”

Gen. 25:27-34, John 9:4

*By: Pro.Pastor St.Lianboi
P.Gamhawi Village*

THUMAPUI

Bible sung ah Isak chapa Jacob kiti pa hi, mithupi tak khat ahi, ama nasep leh athil bawl chuleh, a hinkhua matdan haw I et leh kihil na thei tampi a um hi, hun lemchâng ahiat ziaak ah, alaw tinna haw pawimaw te points pani (2) vel muthei ahi.

**HUN LEMCHANG HIAT HI LAW TINNA AHI
(Gen. 25:27-34, Eph. 5:16, Col. 4:5)**

Jacob chun a nek dingah aki huan An chu, a u pa Esau gilkiak ah, a um laitak ahi ziaak in, a anhuan chu, ahun ducha tan, a duchak lai tak in, a u pa Esau chu a pia'n, a ki chawkw dawkw tai. Suapite haw phatpha kiti hi, hun zosia hung ahi puan, um le ahi diak puai, tuni hi nang a ding ah phat pha le hithei/himaithei ahi. Ahin, la kichawkw man na diam? La kichawkw man pua diam? Chawmkhat zo leh la phat pha chu, hung bei kit ding ahi. Lawtinna ding ah phat pha leh nipha haw hi matthiam leh zuithiam apawimaw ahi. Amang thiam leh a zuithiam haw lak a chun Jacob le khatna ahi.

Leisiat chung ah mi lawting haw hi phatpha, hun lemchâng, mangthei, chawthei/chawman haw ahiu. Phatpha a um ahileh, hun phalo le a um tina ahi. Mihiam te hi a phat bi dungzui ah tawi leh

hing ihui tihi (Thugentu 3:1-8) I et leh, thil zosian hunbi anei chiat ui ti ei gen piak ahi.

Mipha inle, migilo inle, hunbi anei gel gel ui, nang inle la nei hi ti kihet in, Bible ah kimu mihau pan, leisiat chung ah a bawl ding chu, a thi zo in a geldawk bep in, bawl nuam kit maleh, bawl na ding, hunpha anei hun ah a bawl tak lo ziak in, akikhel nung in bawl a guat vang in a hi thei ta puai. Thilpha a sep ding dawl a sep thei lo phat in, Abraham kiang in a dawn in, a suapi pawsal nga haw, ama thawk gual athawk lo na dingin, mithi haw lak ah khat ei sawl piak in tin a dawn hi, himaleh a san piak ta puai.

Pathian leh Abraham in, mihaupa suapi haw chu ahukhin nuamlo ahipuan, ahun bi akikhel tak ziak ah hithei lo zaw ahi. Pathian mi zosia ahepi in, a lungsiat suak hi, kisiam phat na diu hun eipia zing ahi. Juda Iskariot khale apia'n maleh, a lung aheilo ziak in, ama leh ama kitha na hung tung kha ahi.

John 9:4 Sun ahi pet ti helo ten, taksa lam ale, Pathian thu ale, lawting lo ding tina ahi.

LAWTINNA DING IN, TAKSA NGAICHAT TE CHA'N AH, THAWK HAM HAM DI.

(Jacob 1:12)

Jacob chun a gilkiak ziak ah, anak ding An akihuan in, a hin, a upa Esau in, ahung duchak phat in, ama, gilkiak ma ma lehle a thawk ham ham in, a upa Esau gilkiak chu a piak tak ziak in Esau apat in u pa hina a chaw dawk tai. (Gen. 25:33)

Chuleh, Jacob chu a gilkiak ma ma lehle a thawk ham ham ziak in, a pu Abraham apat Isak malzawlina chun a nung a zui pek in, ziagual a chun, ama suan leh pak tiang in malsawmna a chang tau ahi. Zia malsawmna ziak a chun, ama suan leh pak zosia le Israel gam ah tuni tiang ahin, a cheng nalai ui tia Bible thiam haw apat het ahi, mihiam te eipui mangthei, eisusiathei, duchakna, etnuamna, chia nuam na haw tampi um ding ahin, kikang se ding ahi, chutileh, Jacob lawtinna thugûk chu, ei uh le, chang ngei ding ihu.

Suapite haw, Paul in Ephesa Kochuamte kiang in, nite, hunte aphot taklo ziak in, la hunte phate mang un ati gual in (Ephesa 5:16) hunpha imu teu hi, Lalpa dawigual bawl na leh chawihawi nan mang le hin, Jacob lawtinna go kuaman alak piak thei lo chu, ei uh le, chang ngei ding ihu ti hi I gen nuam pen uh chu ahi, chang thei chiat ding in Pathian in a thu I gen teu hi ei malsawm piak taken, Amen.

MALAM KINEPNA

*By: T/Upa LM. Vaiphei
S.Munnuam*

Lalpan I ma teu ei pui ah Khawvel HI leh GAU lengvel te lak ah malam naw zel thei ding ah DAMNA ei pia tu Pa Pathian kiang in kipak thu I gen uh ahi.

Gingtu te ding ah hinkhua sunuam pen leh kipak sak thei pen hi, gingtu ziak ah malam kinepna leh taksan na hi ahi pen hi.

Sam No. 146: 5 na isim chun Lalpa chung ah kinepna zia mite chu mi vangpha ahi ti ei kaw k mun ahi; Lalpa Jesu a Lal leh Hukdampading ah kisan ah Lal ah amng te ding in vang bangkim ah akinep nau teu chu ahing in, a taksang sek un ahi, a damlo un a damna ding a dawt phawt uh leh damna a chang sek ua, a lungngai lai tak un le thamuan na leh kipâkna a dawtna khel un a mu sek uh ahi, ahaksat lai un panpitu ding a hawl sek un panpitu ding ahung um zel sek ahi. sum leh pai a pawimaw lai un le a pawimaw na khel un mat ding val a musek zel sek uh ahi. Ama vang Pathian mel helo te ding in chu kinepna te chu a tak a chang ngai puan, athawn zaw sek ahi, banggual kinepna a ang in la nei em? tunin ki ngaitua in.

Malam ah kinepna la nei te chu takchan la nawp ahi chun, ama Jesu melhetna nei masan aman nang a ding in bangkim hung guan piak ding ahi. Kumtuang hinna, Pathian cha la hung hitheina ding in, Kalvary tang ah migilote kith ana gual in Khross ah khai kang in a hung um masa ataksa ngei in thina ahung chang in, Vui in a um ah nithum nin hungtho kit in lei leh van ah thunei na piak ahi tai, Matthai 28:18

Ama thu lo in pa'n Pathian in bangma mihiam te ding in a bawl ngai talo ahi, malai in vang Pathian in chapa thu panglo in a nawp nawp a daw i daw i uh a bawl piak sek in, tun vang chapa Jesu Khrista phalna lo in leh hepina lo in bangma a bawl ngai talo ahi, la kinepna chu Jeu Khrista ahung hi tak zia k in.

Ziaziakchun, unaute kingaitua hitiu, I malam ua bang hung tung ding ahi ihe pua ngal ua, dan ni tak leh la kinepna/I kinepna teu chu a thawn hung chang khan na e..... ziaziakachun, Khrista ah siamthak la hi, I hui a ngai ahi, pawlam latdan dungzui in nangma

le kisukdanglam ding la guat ah kisiam thak la guatlo ahi chun dan ni tak leh vaihawmna tawp khawk ma ah la ding ngam na diam?

Ziaziakchun, “Aw nang uh semgim leh puakgik pua zosiate haw ka kiang ah hung un, keiman ala chawldam sak ing ka” a tii, Matthai 11:28-30.

Tulai khawvel thigua nun te leh thil suakte hi hechian in malam kinepna hin kalsuan zel in – I thagau a ding ah hinna I chan thei na ding in, gingtute a ding ah kinepna ga kawt kihawng imu chian thei na ding ua Covid – 19 hi a hung lang ah khawvel pumpin thina leh launan I dim ta mai ahi, ahin nang leh kei in vang Covid – 19 sang in gitlona hi lau zawn, malam ah kinepna chu del ham ham ah chia ah, pangjel thei ding I thagau nun hi danglam sak in Lalpa a ding in hing zing thei ding in Lalpan a thu sim zosia te chung ah ahepina nai zing thei ding in ei malsawm piak ta hen.

THEPNA BANGTI ZAW DING?

*By: Upa S. Haulal Vaiphei
Moderator RCG*

Article masa Nov-Dec 2021 Contineu.....

3. Thepna a ban ban ah ahung tun ziak ah ngaw lo di.

Jesu'n thepna tuipi lian gual in a hung vang in a zo pek ah, a ban ban in chanchinpha Mathai 4:13 na imu ahi, thepna chun anusia ah hun lemchang dang a ding in. I kalsuan nau lampi I chawl phat leh ti chu napha sep biak in kihawp leh a dang dang I haisan

phat leh thepna chu le ahat ngai pua napha isep zing ah Pathian dawigual I bawl phat leh aman leh thep dan chuam chuam in ei hung thep zel sek ahi. Jesu chu a chawl pua Setan le a tactic a theng zel ah a lung na ma ma jeng hi ti Bible apat zil thei ahi. Jesu chu thepna bangzat ah thep himaleh azo pua, Adam vang kha thepna a bul in a lel ngal ahi kha unau te, Mitamtak in I buai nau hi bang tin thepna ka do di jia gual lawm a mi chung a le zia gual ahi tung puan na hiti lawm lawm hi iti sek ua, maleh Job leh Jesu apat izil diu chu thepna bang gual in hung leh le zaw di do dan di ei hil ui. Job gual ahin ki um taleh a suakte sabirian ten a tha piak thu ahung hil ua, zia zaw a chun a belamte van apat mei in aka lum ah, zia thu agen zaw leh sangawng sau te ten aki puak mang thu a hung tung kit ah chun achaina a chate a um nau in hung chim in a chip khum ah a leng un a thiu thu ahung tung akhan ei haw zia gual lawm lawm ahin ichung un thep na a tung kha em? Zia gual lawm ah a tuak lai inle Job in gitlo na leh kamsia bangma a bawl puai, lungkham tak sang in Pathian a ho ah a thil mangte haw zia in akap lo ahi. Pathian a chawi hawi in, apak cha hi. Thepna kiti hi a lian a neu ti um chuam diak lo ahi, gitlona ahi vek ahi. Thepna thuak ham ham chu a vangpha ahi, a zaw phat leh kipak man chang ding ahi. (Jakob 1:12)

4. Amun leh gam ngaw lo di.

Thagau Thiangtho in Jesu kha gamthip a apui lut ah chun Pathian in Adam kha Eden huan ah a kawhi ahi. (Mt. 4:1, Gen. 2:15) Jesun gal a zo ah Adam in a lel hi, amun leh gam in a pua lo ahi I lawtin lo na hi.

Joshep a u ten Aigupta te kiang ah a zuak uh kha Pathian in zia chun a sawl zawk ala hi. (gen. 45:4,5) Aigupta te hi asal dan uleh a gitlo dan uh hiat ahia, amau in mikhat tha a agilakpiak le

khok salo a hiu va. (Gen. 12:12) kihiat thiam na dan chu umlo ahi banglam banglam inle, Potipher chu pharaoh te officer khat ahia a zi in Joshep a dawu cha a insung enkawlpaw chu (Gen. 39:5-7) zia gual ah thepna nasatak le gitlo bawlna di lemchang ma ma a um lai in Joshep in gitlo a jam san ah a bawl lo ahi kha.

Danial apat hile I zil din a um hi, Babylon gam ah mat ah a um lai in zia gam chu Pathian hialo leh gitlona tin cheng nawpsak tincheng dim ahia, zia gual dan phalo lak a chun Danial chu a chuam in a um chuam ahi kha, lengpa antui tak te leh dawn di te sang in anche leh tuithiang mai ne ding in aki dawn zaw ahi kha, tulai ei uh vang zia din mun ahin bang gual in la um diam? Kuaman a piaklo thilphalo tam tak inen I dawn uh hilo maw.

Tulai Khristian te sakhua hina lam ahin a diak ah ei lak ahin en le hing pan mun muna ding ahem, Government nasep lawting na ding ahem leh vangphat na ding bep ah Christian hi kitam ahi. Zia gual chu chanpha chan na ding ah Jesu lungsiat ngaina kisa hepitaq tak lo kitam ahi. Banggual dinmun ah um le chun le la din mun chu hak hen la nuam maleh Pathian in zia hi ei kawu na hi ka sep ding a um ahi kapan na ding ahi tia, ka tuak ding ahi tia lungawi tak ah lawtin lona le plunna di umlo ahi tia lungawi zawu thei te chu zona chang te ahiu.

5. Mawlina leh hiatlo thiamna neilo na ngawh lo di ahi.

Adam leh Evi thupiak leh dan hi a chiak khawp mai hiatlo di gual ei puai ti chu hiatmaw di ei puai ti chu simple ma ma ziang bangma lo ahi (gen. 2:16,17) ahinla, amau teni khan a zui zo puau hi a fail tau ahi kha. Bible ah kimulo chu Jesu kiang ah suang vaithum suak sak kin biak inn chung ah ki chawm tha kin tite himaleh, Pathian dan chu thilpha leh thilsia hiatkhen theina a piak dungzui in aman setan thepna chu a zo ahi kha Maleh ei hawn le I

hiat ding chu ahi leh Setan dawí lam chu Pathian melmak na ahi. Zia hin I hiat ding chu thilpha leh thilsia hiat khen theina Pathian in ei pia chiat ahi Jesu thepna a tuak apat khan suang vaithum suak sak in a ti ahin cha hina a lak piak guat ahi, apani na hin, Pathian a ze et na ahi. Diabol chun Jesu chu lung thawi sak a guat ahi ti chu Pathian thilbawl theina chu bang ma lo ah suak sak a guat ahi. A Pathian na chu a gam gi suk kek a guat ahi ti chu Pathian chiapi hina palkek sak a guat ahi.

Bangtik lai inle ka hiat lo ziaq in lawting lo ka hi ti kin, hiatlo molti hi kilem nan mang kin Pathian in thutak I lungsung in a kawí ahi, a dan I lungsung in a kawí ah, Bible I khut un ei kawí piak ua, Thagau Thiangtho ei mau ah um pen hin hun tin ah ei hil hi. Bawlthei di leh bawl lo di hun in leh phat tin in thupiak piak ngai ki hi lo ahi, ahun sin leh hil kingailo ahi, Bible in chep kin nekin ti a um puai ahin, Principles/tichu a chia tangpi chu a um sa ahi. I taksau Pathian Thagau Thiangtho chenna temple chu subuak lo di ahi, thil thiango in banggual thilhitheina hi ziang leh le I sukbuai lo diu ahi zia haw thilthiang lo apat hin eima chin apha leh a sia hetkhen theina inei chiat uh ahi.

Nang pha lasak chu mi bawl ding in hil in, ti hilo vin phasak bep hilo pha la bawl chu bawl ding in hil in phalo ah la hiat chu la bawlló chu bawl lo ding in gen in.

Taksa leh Thagau a ding ah pha chu hawl in/sem in/zil in/hil in. Lalpan a thu malsawm ta hen. To be continue.....

**PATHIAN THIL HITHEINA MIDANG KIANG AH TAKLAT A
HITHEINA DING IN NANG A MAMAW LA HI**

*Pi Thianneilian @ Th. Ashy,
S.Munnuam village*

Pathian a hina tak ah Pathian hithei zing hinapi in, Pathian a hina ziak ah thilmak leh lamdang a bawl na ding in NANG mamaw ahi ti hih la ngaitua tak tak ngailo maithei hi. Nguntak in ngaitua vawng vawng leh chun, bangkim ah Ama beltute chialna ziak leh a mittung a chate dawtna apat Pathian a hina a taklang sek ahi ti hi, i Bible apat munchuam chuam apat muthei himaleh ka lungthim ah kilang diak te apat hun suklat ka nuam hi.

1. Pathian in Mosi kiang in, “Ahi’n, nang in la mol kha lâm inla, la khut chu tuipi chung in vak zâk inla, tuipi chu vak khen in” ti’n thu a pia, Pathian thupiak gual in Mosi chun tuipi chung ah a mol chu lâm ah a vak khet chun, Israelte chu Tuipi lâitak ah chun lei hul chung in a chiatheng thei tamai uh ahi. Mosi khan a khut ah mol kha tuipi chung ah lâm lo hial maleh Pathian in Tuipi chu a tingtan mawlo hial ding ahi. Himaleh, a matchak Mosi apat a thilhitheina suklat ding chu Pathian sumsialna lam ahipua, a mi matchak te ziak ah a lopina leh a thilhitheina suklat chu a lunglam tak ahi ti chu muthei ahi.

2. Lengpa Herod in kochuamte lak ah kuate ahem chu a la hi’genthei mama in, Johan suapi Jakob khale chemjam in a la that ngei ahi. ziagual ah a bawl kha Judate a kipak ui ti a hiat ziak in, Peter le mat ah Judate mitmu ngel ah tha kit ding a gua, a mat nung in suangkul ah khum in vengtu kitup tak a kawhi hi. Zing khua hung

vâk leh Herod chemsau ah thimai ta ding Peter dinmun chu banggual ah lauthawn um a hita diam ti la ngaitua ngai em? Mihing ngaitua na'n vang pumpel thei ding gual chu a hi tapuai. Vengtu Sepai pawl li, pali chiat ah kisân sak zel lak ah zanthim nuai ah suachat ding dan chu, mihing ngaituana'n vang a umthei talo hial mai hi. Himaleh, Kochuamte'n Peter a ding ah chun phatchuamngai tak in Pathian kiang in a la dawn ngut ngut ua, Herod in puidaw a guat zan tak ah chun Lalpa vansawlchak khat suangkul sung ah valut in Peter chu a va'puidawk ta a hikha. Lunggil tak ah kochuamte pauchapna hi Lalpa'n a ngainep him him puai ti muthei ahi. Chanchinpha puanzak zelna ah mi phachuam mama Peter kha, Ama mimal dawitelna in Lalpa'n suangkul apat a puidawk thei mama hi. Puidawk thei puana ti in vang ginlelna him him ka nei puai. Himaleh, Phatchuamngai tak ah kochuamte pauchapna Lalpa'n a pitin sak ahi. Ziagual ah a Pathian hina suklat kha a nawp lam tak ahi tile hiatthei ahi.

3. Israel chate'n Joshua mapuina ah Jeriko kul thupi tak mai a do lai ua khan, Thiampute pengkul mut git leh mipite kiko thawm mai khan Jeriko kul thupi tak mai kha a chim tha zung zung mai ahi ti I muthei ui. Ka ngaituana um mama khat chu, Jeriko kul thupi tak mai kha bangchan lut ah a sak uh a diam, Sakawl kangtalai pani kipeltua theina kulbang sak zawna ding ah sum leh pai, tha leh zung, hun leh ni lut ding hih duaisan hilo hial ding ahi. Ziagual tuk ah kul lopi kisiam, Vengtu Sepai kitup tak nei, vak do zo ziang thei ding Sepai chu banggual bep in a tam diam, banggual bep matchak nei a ngai diam tite hi ngaitua na'n ka la nei sek hi. Himaleh, mihingte ngaituana khel lam ah lemguattu Pathian chun Joshua kiang in zawna thuguk a la genta, zia thuguk Lalpa apat a dawn gual ua chun Israelte chun a bawl tau a, ei uh ginchatna gual hilo

tak in Thiampute pengkul mutgit leh mipite kiko thawm chun, ziagual lawm ah kul lopi chu a chimtha zung zung tamai ahi. Pengkul git leh mipi kiko thawm ah chimtha ziang thei tho tho chu, mipite tawilawk lo hial in le Lalpa'n a zo thei mama ahi ti a kichian hi. Himaleh, Lalpa'n vang, Joshua leh a mipite apat a thilhitheina suklat ah aum ding chu a dawizaw, thupi lo takgual ah kilang lampi a kawkmuna chun zawna le a kawi ahi ti imu thei ui.

Pathian tawh nangma kika'l in banggual kiguizawpna aum em? Kiguizawpna ziagual tiang hih ka nei ui ti ah ngaidan gen ding neukhat khat bek nei chiat ngei hitiu. Nang hun mamaw lo Pathian hi in la gel em? Eima ei mamaw ngailo Pathian hileh vang, phatchuam ngai tak ah i pauchap sekna te'u hih a thawn hi'ntin, a thu leh la ah i kipawlkhawm sekna te'u hile bangma lo mai hi'ngei ding ahi. Ahi'n, Lalpa'n ei mamaw hi ti I hiatziak un i pauchap ua, ei mamaw hi ti i hiatziak un panpi ngai ah i hiat te'u i zaw kham kham un i panpi sek uh a hikha. I sumsial puau in i kisik diak puau. Aziakchu, "theitawk sua ah thilpha i sepna te'u Lalpa'n a hiai" I ti'ziak uh ahi. I nasep hetu Lalpa chun, Lei mun a hilo inle Van gam ah ei dit kit ding ahi ti kinepna i nei ziak uh ahi. Kinepna ziak ah gin-um tak ah Lalpa nasepna chun, Pathian in a lopina leh a thilhitheina suklatna ding in a mamaw zing ahi ti a hiat ziak in aum awl pua, a theitawk sua in Lalpa nasep na'n a pang ham ham sek ahi.

Eden gitlona ziak ah Setan suak ah ium lai ua khanle Lalpa'n ei hepi mama ziak in ei mamaw, a Chapa thisan lul tak ah chun ei hun tandawk ta ahi. Suak ngawngkol ah tang talo ding ah ei thadaw nung vang ahin banggual bep in ei mamaw ta diam ti ngaitua thak hitiu. Insung limna ding in NANG a mamaw in, Kochuamte halthak

theina ding in NANG a mamaw in, I gamsung bep hilo Khawvel pumpi ah Pathian ngaisakna a pun diak theina ding in NANG a mamaw zing ahi. Sukgentheina ziak ah Khawvel kiltin ah gingtu kiteza'k te kiang in Jakob chun, "Pathian chu nai un, tichun, ama'nle hun nai ding ahi" ti'n lekthawt lungsiat umtak a la thawt hi. Sukgentheina ziak ah munkhat ah umkhawm zing thei ta lo a hi'nung ua khanle, Lalpa'n a mamawna a hiatmil kha'k ding uh launa ziak in Pathian tawh kigamla him him lo ding in a kiti'l hat zel uh a hikha.

Mi'n vangsiatna a tuak lai ua kipakpi sek, Insak leh thang ah suapi gual ah i la neite kinak kibau ni ah kihiatlo sak ziang i hitawl uh em? Ama'u kiang ah chamna siamtu palai ding in Lalpa'n nang hun mamaw ahi. Jakob 3:18na chun, "Dikna ga luak chu chamna tu' ahi'n, zia chun chamna a siam hi" ti'n a la gen ah, "Chuleh, la kengte'u a ding in chamna chanchinpha chu but un" Ephesa 6:15na chun kichian tak in a la gen hi. tuni hin, a kuakte hi'dim ah, a kawite hi'zan nawpna lunggel pawlo i hui ah, midangte thangsiat zing thei ihui chun Lalpa'n ei mamaw lam kihiatlo gingtu, Mitthum hi'ngal ah lamsau tak zawt ding ah kisingsate gual mai hi ding ihui.

Pawsal khat hin hivei hawilo tak mai hi a nei in, zia'h a hivei chun a pha'k hun leh a chilphuante nawk in a kitel ziang sek in, Pawsal hattak mi thum leh li hial in a tu'k ua lehle a zo ngai puau hi. a lei a pet in, thisan pawt zung zung in aum hial sek hi. A hinkhua chu lungsiat aum mama ziang sek hi. Nikhat chu, a inkiang-pa mai mai, midang gual ah pauchap lawting ti ah tepte le a la hi'ngailo khat hin, Pathian min suang in, a hivei in a phak laitak chun, a chung ah a khutngat in a pauchap piak ngut ngut ziang ta, Pawsal hivei neipa chule a hung dam ta ahi. "Ka khawhiatna umsun sun ah ka lunggel

ah chun, zia'h ka hiveina apat ka hung haldaw phat leh kithat ngei ngei ding ka hi. ziagual haksatna thawk zing hih kei di'n a haksa taluai" ti'n ka la kitiam hial ta'n, Himaleh, lei pauchap piakna apat chun damthiang ngei ding ka hitai ti chu hiatsak in ka um hi" ti'n a la gen ah, ziagualmachun, tuni tiang in zia natna hivei hawilo tak chun a pha tapuai. Zia chanchin apat i vak ngaitua ding ua pawimaw ka sak mama chu, Ziapa chu panglo ah Pathian in sudam theilo in gel kin ti hih ahi. Genesis 1:3na chun, Pathian in, Vak hung umhen" a ti'n; tichun,vak chu a hung umtai ti imuu ahi. Aum ngailo kiangah "Um hen" ti ah umsak ziang thei Pathian chun zia'h hivei chule a hidam thei mama hi. Himaleh, Nangma ginna zia ah Pathian thilhitheina midang kiang ah suklat ah aum chu Ama sumsialna lam a hilo zia in NANG mamaw zing ahi.

Bangma lo gual ah kigel in, Setan suak ah tang nalaite umchan gual in um tapuai tiu. Suakngawngkol ah tang kit ta lo ding ah ei thadawk pa i Pathian un, midangte kiang ah a lopina leh a thilhitheina sulangtu di'n ei mamaw zing ahi ti ngaitua zing kawm in Ama nai in umzing hitiu. Lalpa'n simtute zosia, a lopina leh thilhitheina sulangtu hi'zing thei di'n ei malzawl chiat taken.

PAUCHAPNAN HETDING TE

1. RCG Annual Council cum RWF Annual khawmpu date: 17-20, February,2022 hun sungah Gawtangkawt vangkhua um dingin program bangkim hawpdaw ahi taw kitawn in buaina umlo ah mat ahithe ngei na dingin I Pauchapnau in he zing hitiu.
2. RCG sungah zillai secular lam a ineicha sun sun teu in Pathian nei pum ah thiamna sangtak in ahun zaw chiat thei na ding un.
3. **Bible zillai tu leh tu ah umte:**
 - a) Tv. Zuannunsang (Kh.Sang) D.Min. final year, HBI Extension Dimapur.
 - b) Rev.Liante M.Th. Final year SHUATS Prayagraj U.P. India.
 - c) Nk.Kimzina (Zina) B.Th. 1st Year ECT Churachandpur.
4. RCG Center Choir ten Pathian lopina akilat zeltheina ding tiang ah lasak thiamna leh tawm ngaina ahun nei thei na dingun.
5. Biakin salai Gawtangkawt te leh Mualkon ten ahun sak zaw theina dingun.
6. I pawlpi sungua State Govt. Center govt, Sepai leh Private company ah sepna neiten asepnau mun ua pat lawtin na chuam chuam ahun nei ua, sawm ah khat le diktak in ahun piak daw zelthei na ding un.
7. RWF te vehicle project ahung lawtin ua, Mission HQ support tu ahung pan theina dingun

REPORT

Zion Thusuak fees kumbul January 2021 apat December 2021 sung ah kimu dan ziagual hi ahi.

SL. No.	MIN	UMNA	RUPEES
1	Pa (L) Hengen	Gawtangkawt	100
2	Rev.Ngulneipau	Hilltown	100
3	GL Muanna	Gochinkhup veng	1,100
4	Khawlokim	Gochinkhup veng	100
5	Paulian	Mualkon	300
6	B.Athang	Kamdoveng	100
7	Upa K.Kama	HQ veng	100
8	Paukhup	Mualkon	200
9	Nu Zokim	Hilltown	500
All Total			2,600

Fees piate chungin kipak thu ka hun gen ahi.

**REVIVAL CHURCH OF GOD LAMKA BIAL SUANKHAT
ANNGAWL PAUCHAPKHAWMNA REPORT**

A chiata date: 30th-December, 2021 (Thursday) ni khan RCG Lamka bial ten Hilltown RCG center church mun ah Zing suankhat anngawl pauchapkhawmna hun mat ala hi, zia hi a bik tak in Unau MCRC te apat Thagau thusuak um dungjui ah bawl ala hi, a ziak chu Churachandpur district in insuan ah thina leh kidona hung tung ding in a um in kua le Pathian ah sual simna nei ah ama Pathian

lunglam ah umte chungin tung lo ding ahi ti thu um ziak in, sual simna leh thupha chawina hun mat ahi, limlak khen khat te ahi.

H E T S A K N A

Mimal kua tawbang Kochuam sungah sawm ah khat piatheilo, chuleh Zion Thusuak lakman hun pia nuam ten anuai ah RCG Bank account number leh Bank min chuleh IFSC number kipia a hin hun thawt thei inlau ti in ka hun hetsak ui. Editor Zion Thusuak Board.

Account Name : Revival Church of God
Account Number : 11343704608
Bank Name : State Bank of India
Bank Branch : Churachandpur main branch
IFSC : SBIN0006182
Branch code : 6182
MICR Code : 795002504

ZION THUSUAK PATRON MEMBER TE

- 1) Pu Thangboi, Kohima
- 2) Nu Niangneu, HQ Veng
- 3) Nu Lily, T.Munjang
- 4) Nu Samboi Vanghoiphai
- 5) Pu GL Muana Neitham, Gochinkhup veng

Patron members kum 3 (thum) 2020 apat Rs 1,000/- hita ahi.
Life member dingin 5000/- ahi.

-Editor, Zion Thusuak Board

ZION THUSUAK

Collector/Magazine Agent:

- | | | | |
|-----|---------------------|---|-----------------|
| 1) | Tv. Douminlun | - | Hilltown |
| 2) | Tv. Lalroman | - | T. Munjang |
| 3) | Pa Paelim | - | Kangvai |
| 4) | Upa Tongjang | - | Imphal |
| 5) | Upa Khailiankham | - | Nakhujang |
| 6) | Upa Manglun | - | S Elimphai |
| 7) | Upa Liankhai | - | S Kanan |
| 8) | Pa Mangminlun | - | Gawtangkawt |
| 9) | Pa Khamneu | - | Jordanphai |
| 10) | Tv. Hauginlian | - | Bewlahland |
| 11) | Upa Mamang | - | Mualkon |
| 12) | Pa Ts Boipu | - | Mantripukhri |
| 13) | Pa Lenghau Phaltual | - | Vanghoiphai |
| 14) | Pro Pastor Lianboi | - | P. Gamhawi |
| 15) | Upa Lalla | - | L. Vaiphei Veng |



BOOK POST

RNI Reqd. No. 34293/80

7a,

.....

.....

Stamp

If undelivered please return to:

The Editor
ZION THUSUAK
RCG Head Office
Thangzam Road, Hilltown, Churachandpur, Manipur
PIN – 795128, P.O. Box No. 91
Email: rcgmission@gmail.com
Website: revivalchurchofgod.org
Contact: +91 9612652209 (Exe. Secy.)